

## Script of Morning Gojri News Bulletin 21 August 2024 at 1015Hrs

مارننگ گو جری نیوز بلیٹن مورخہ 21 اگست 2024

\*\*\*\*\*

یوہ آکا شوانی جموں ہے محبوب سلطانی تیں خبر سُنو۔

### Final Voters

جموں کشمیر مانہہ ووٹراں غی تعداد مانہہ 93 ہزار نواں ووٹراں غو بابدو ہو وُ ہے جد کہ یوٹی جموں کشمیر مانہہ پولینگ اسٹیشنن غی تعداد مانہہ 2 سو غو بابدو ہو وُ ہے۔ مہارا آکاشوانی جموں غا نمائندہ نے خبر ٹوری ہے جے یکم جولائی 2024 تک انتخابی فہرستان نانہہ اک بار پھر نظر ثانی غا کامیاب انعقاد تون بعد اس بارے جانکا ری سامنے آئی ہے۔ اس سلسلہ مانہہ جموں کشمیر غا تمام 20 ضلعان مانہہ نظر ثانی غی مشق نانہہ کامیابی سنگ مکمل کر ليو گيو ہے۔ جن مانہہ تمام اہل شہری جہیزا 18 بہراں غا ہو چکا ہیں یاہ جنہاں نے پہلی بار اندراج کروایو ہے تیں علا وہ نا اہل ووٹراں غی پشان کر غے انہاں نانہہ ہٹان تیں علا وہ دیگر چیزاں نانہہ درست کر ليو گيو ہے۔ واضع رہ جے درستگی تون بعد ووٹراں غی کُل تعداد 88 عشاریہ 03 لکھ پُج گئی ہے۔

\*\*\*\*\*

### ECI Notification

بھارتی چناؤ کمیشن نے پچھلے تہاڑے جموں کشمیر اسمبلی انتخابات غا پہلا مرحلہ مانہہ ضلع اننت ناگ، پلوامہ، شوپیاں، کلگام، ڈوڈہ، رام بن تے کشتواڑ غی 24 اسمبلی حلقاں اندر پہلا مرحلہ مانہہ ووٹ کھلیا جائیں گا۔ جد کہ باقی اسمبلی حلقاں مانہہ دوجا تے تیجا مرحلہ مانہہ ووٹینگ کرائی جائیگی۔ اس ضمن مانہہ کاغذات نامزدگی واسطے ناں داخل کران غی آخری تا ریخ 27 اگست رکھی گئی ہے جد کہ 28 تا ریخ نانہہ کاغذات غی جانچ پڑتال کی جائیگی۔ تاہم امید واراں واسطے ناں واپس لین غی آخری تا ریخ 30 اگست رکھی گئی ہے۔ واضع رہ جے ان اسمبلی حلقاں مانہہ ووٹینگ غو سلسلو سویرے 7 بجے شروع وے گو تے شام 6 بجے تک جاری رہ گو۔

\*\*\*\*\*

### Hideout

ضلع راجوری مانہہ حفاظتی دستاں نے پچھلے تہاڑے دہشت گرداں غا خفیہ ٹھکانہ نانہہ تباہ کر دتو ہے۔ سرکاری ذرائع غے مطابق سرحدی ضلع راجوری غا دربال علاقہ غا سگاوت جنگل مانہہ فوج، سی آر پی ایف تے پولیس غی طرفوں سانجھا طور ور شروع کی گئی تلاشی کا روائی غے دوران اس خفیہ ٹھکانہ تباہ کیو گيو ہے۔ اس ضمن مانہہ مزید جانکا ری غے مطابق اس کمین گاہ تون روز مرہ غی ضرورتاں مانہہ شامل چیز جن مانہہ مادو کرن واسطے گیس، کمبل، پانڈا وی برآمد کیا گیا ہیں تاہم اس سلسلہ مانہہ کسے غی گرفتاری بارے کوئی وی سُو نہیں ملی تے منیو جا رہیو ہے جے دہشت گرد علاقہ غی کھیرا بندی تے تلاشی کا روائی تون پہلاں فرار ہون مانہہ کامیاب ہو گیا۔ اُنکاں حفاظتی دستاں نے ضلع ادھم پور غا بلو تہا علاقہ مانہہ دہشت گردی مخالف کاروائی غے دوران اک کلاں آروں خفیہ ٹھکانہ نانہہ تباہ کیو ہے۔ تاہم اس خفیہ ٹھکانہ تون وی کھان پین غی چیزاں نانہہ برآمد کیو گيو ہے۔

\*\*\*\*\*

Chief Secretary

چیف سیکریٹری اٹل ڈلو نے پچھلے تہاڑے سول انتظامیہ تے پولیس محکمہ غا اعلیٰ عہدیداراں غی اک میٹنگ منعقد کر غے یوٹی جموں کشمیر مانہ اسمبلی انتخابات غا پُر امن انعقاد واسطے حفاظتی بندوبست غو جائزو لیو ہے۔ اس تیں علا وہ اُنہاں نے متعلقہ صوبائی کمشنراں، ڈپٹی کمشنراں تے گڈیاں لاریاں غا محکمہ غی طرفوں کی گئی تیاریاں تے ضرورتاں نانہ پورو کرن با رے پلان غی وی جانکا ری حاصل کی۔ جناب ڈلو نے انتظامیہ نانہ کہیو جے وے چناؤ لڑن الا اُمید واراں غی حفاظت تے رین سہن با رے پورو خیال رکھیں۔ اُنہاں نے مزید کہیو جے اِن اُمید واراں غی انتخابی مہم تے دیگر ضرورتاں با رے ضروری انتظامات نانہ یقینی بنايو جا ئے۔ جناب ڈلو نے ہدایت جا ری کرتاں واں کہیو جے اس سلسلہ مانہ روزمرہ غی بنیا د ور پیش رفت با رے جانکا ری فراہم کریں۔

\*\*\*\*\*

### Monkeypox

صحت تے طبی تعلیم با رے سیکریٹری ڈاکٹر سعید عابد رشید شاہ نے پچھلے تہاڑے عالمی صحت تنظیم غی طرفوں حالیہ منکی پاکس وائرس با رے ہنگامی صورتحال ور روک تھام غے چلتیں جموں کشمیر مانہ عوامی صحت اداراں غی طرفوں کی جا رہی تیاریاں غو جائزو لیو گیو ہے۔ اس ضمن مانہ جناب شاہ نے تمام شراکت داراں نانہ ہدایت جا ری کی جے کسے وی صورتحال سنگ نمڑن واسطے مکمل تیاریاں نانہ یقینی بناویں۔ اُنہاں نے بکھ بکھ محکمان غا اعلیٰ افسراں نانہ کہیو جے یوٹی جموں کشمیر مانہ مشق کریں تے تمام صحت اہلکاراں غی تربیت نانہ یقینی بناویں۔ اس تیں علا وہ اُنہاں نے تمام تر ایچ او ڈیز نانہ کہیو جے وے اس مقصد واسطے جموں کشمیر غی تمام صحت سہولیات مانہ الگ وارڈاں غا قیام نانہ یقینی بناویں۔

\*\*\*\*\*

### DEO Reasi

ضلع چناؤ افسر ریا سی و شیش مہاجن نے پچھلے تہاڑے بکھ بکھ سیا سی جماعتاں غا نمائندگان غی میٹنگ بلا غے اُنہاں نانہ اِن الا اسمبلی چناؤ غے چلتیں بھارتی چناؤ کمیشن غی طرفوں رہنما خطوط با رے تفصیلی جانکاری فراہم کی گئی۔ اس ضمن مانہ موصوف نے انتخابات متعلق کا رکر دگی بشمول مہم، ریلی غی پہلاں توں اجازت لین بارے ضرورت ور وی زور پایو۔ اُنہاں نے مثالی ضابطہ اخلاق ایم سی سی غی اہمیت ور وی زور پایو۔ تا نجے صاف و شفاف چناؤ نانہ یقینی بنايو جا سکے۔ اُنہاں نے سیا سی جماعتاں غا اُمید واراں غی ذمہ داری نانہ وی اُجاگر کیو کیونجے چناؤ غا عمل مانہ سالمیت نانہ برقرار رکھیو جا سکے۔ اُنہاں نے لوکاں توں اپیل کی جے وے اسمبلی چناؤ مانہ بدھ چڑھ غے حصول لیں۔

\*\*\*\*\*

### Nodal Officers Poonch

ضلع پونچھ مانہ پچھلے تہاڑے ضلع تے تحصیل درجہ گا نوڈل افسراں غو اک تربیتی اجلاس ڈی سی دفتر کا نفرنس حال مانہ منعقد کیو گیو۔ جس غو مقصد تمام افسراں نانہ انتخابی عمل سنگ نمڑن واسطے تیار کرنوتھو۔ اس موقعہ ور ما سٹر ٹرینراں نے تفصیلی جانکاری فراہم کرن غے نال نال ووٹ کہلن با رے مشق تے دوجی اہم چیزاں غا رول نانہ اُجاگر کیو۔ اس تربیتی اجلاس مانہ خرچہ غی نگرانی ور وی توجہ مرکوز کی گئی جس مانہ بھارتی چناؤ کمیشن غی طرفوں مقرر کردہ خرچہ ور عمل کرن غی اہمیت ور پیش کی گئی۔

\*\*\*\*\*

اس غے نال ہی خبراں غو یوہ بلیٹن ختم ہوؤ۔